

Zoëtry Isla di Oro Aruba

Recientemente Minister Oduber a reuni cu e grupo cu kier desaroya un hotel na Isla di Oro, unda cu el a haya un presentacion di loke e hotel aki lo bay bira.

Despues cu algun luna atras e mandatario a mostra cu e no ta di acuerdo cu e cambio cu a wordo haci na e concepto originalmente presenta, cambianan a wordo haci y e ta mira desaroyo di e hotel aki hopi positivo.

Na e momentonan aki e grupo ta procesando tur e rekisitonan necesario y intencion ta pa e compleho habri su portanan na 2018 bou AMR

Resorts y lo tin e nomber Zoëtry Isla di Oro Aruba. E lo conta cu un total di 126 camber y lo ta enfoca riba e turistanan di mayor entrada.

Obhetivo di e compleho ta pa atrae clientela cu entradanan di 150 mil Dollar of mas pa aña cu ta spera un nivel di luho defini y cu ta respeta e sistema local y di nos medio ambiente.

Zoëtry Isla di Oro Aruba, manera a wordo bisa, lo ta un “high-end boutique” hotel cu lo trece turismo ecologico diferente y cu mayor expectativa pa nos isla. E concepto ta hopi unico pa e region y lo

atrae bishitantenan cu ta buscando destinacionnan exotico manera Bora Bora of French Polynesians.

Durante e reunion y presentacion por a mira cu e aspecto di mantencion y preservacion di nos medio ambiente ta hunga un rol primordial den e desaroyo di e compleho. A indica cu e fragilidad y beyesa di e matanan di mangel, cual ta e atractivo principal di nan proyecto, lo wordo trata cu e mayor cuido posibel. Nan a indica cu ningun mata di mangel lo wordo dañá of kita pa acomoda e estructura di e compleho, al contrario, nan

ta garantiza proteccion di e matanan di mangel. Tambe lo uza solamente materialnan ecologico amical y organico mientras cu lo limita e uzo di concret. Den e presentacion por a mira tambe cu nan lo tin entre 10 pa 15 meter di distancia entre e matanan di mangel y e bungalow pa por proteha e matanan.

Intencion ta pa ora e compleho ta cla por educa turista y local riba e importancia di e matanan di mangel. E proyecto lo inclui un cria y cuido di coral pa preserva esakinan y lo duna tour educativo na e comunidad local pa por compronde miho e balor

di e matanan di mangel pa nos isla.

Ta calcula cu e construccion lo tin un duracion di 2 aña y lo tin un costo di 40 miyon Dollar y lo duna trabou na un total di 788 persona. Na momento cu e compleho ta cla esaki lo significa un total di 252 trabou directo y 165 trabou indirecto.

Ademas di esaki lo trece diferente desaroyonan economico positivo pa diferente sector di nos isla, manera entre otro pa taxistanan, operador di tour, huurmento di auto y lo contribui tambe na aumenta e desaroyo di Pariba di nos isla. □